

四庫全書

集部

欽定四庫全書

集部
康齋集卷十一

詳校官編修_臣李堯棟

中書_臣劉源溥覆勘

總校官知縣_臣繆琪

校對官學正_臣蔡必昌

謄錄監生_臣桑英

欽定四庫全書

康齋集卷十一

目錄

明 吳與弼 撰

夢孔子文王二聖人在南京崇禮街舊居官舍之東廂
二聖人在中間與弼在西間見孔聖容貌為詳欲問
二聖人生知安行之心如何又彷彿將文王書一冊
在案披讀似文王世系已

夢侍晦庵先生側先生顏色藹然而禮甚恭肅焉起敬
起仰也

夜枕思宋太宗燭影事深為太宗惜之人須有行一不
義殺一不辜而得天下不為之心方做得堯舜事業
不然鮮有不為外物所移者學者須當隨事痛懲此
心剗割盡利欲根苗純乎天理方可語王道果如此
心中幾多脫洒伶俐可謂出世奇男子矣

與隣人處一事涵容不熟既已容訖彼猶未悟不免說

破此間氣為患尋自悔之因思為君子當常受虧於人方做得蓋受虧即有容也

食後坐東窗四體舒泰神氣清朗讀書愈有進益數日趣同此必又透一關矣

聖賢所言無非存天理去人欲聖賢所行亦然學聖賢者舍是何以哉

文公先生與學者論躬行云若易時天下無數聖賢了噫實用其力者方知其難可勝歎哉

日夜痛自點檢且不暇豈有工夫點檢他人耶責人密自治跡矣可不戒哉明德新民雖無二致然已德未明遽欲新民不惟失本末先後之序豈能有新民之效乎徒爾勞攘成私意也

貧困中事務紛至兼以病瘡不免時有憤躁徐整衣冠讀書便覺意思通暢古人云不遇盤根錯節無以別利器又云若要熟也須從這裏過然誠難能難能只得小心寧耐做將去朱子云終不成處不去便放下

旨哉言也

文公先生謂延平先生終日無疾言遽色與弼常歎何脩而至此又自分雖終身不能學也文公先生又云李先生初間也是豪邁底人後來也是琢磨之功觀此則李先生豈是生來便如此蓋學力所致也然下愚末學苦不能克去血氣之剛平居則慕心平氣和與物皆春少不如意躁急之態形焉因思延平先生所與處者豈皆聖賢而能無疾言遽色者豈非成湯

與人不求備檢身若不及之功效歟而今而後吾知
聖賢之必可學而學之必可至人性之本善而氣質
之可化也的然矣下學之功此去何如哉

夜病卧思家務不免有所計慮心緒便亂氣即不清徐
思可以力致者德而已此外非所知也吾何求哉求
厚吾德耳心於是乎定氣於是乎清明日書以自勉
南軒讀孟子甚樂湛然虛明平旦之氣畧無所撓綠陰
清晝薰風徐來而山林間寂天地自闔日月自長邵

子所謂心靜方能知白日眼明始可識青天於斯可
驗

與弼氣質偏於剛忿永樂庚寅年二十從洗馬楊先生
學方始覺之春季歸自先生官舍紆道訪故人李原
道於秦淮客館相與攜手淮畔共談日新與弼深以
剛忿為言始欲下克之之功原道尋以告吾父母二
親為之大喜原道吉安廬陵人吾母姨夫中允公從
子也厥後克之之功雖時有之其如鹵莽滅裂何十

五六年之間猖狂自恣良心一發憤恨無所容身去冬今春用功甚力而日用之間覺得愈加辛苦疑下愚終不可以希聖賢之萬一而小人之歸無由可免矣五六月來覺氣象漸好於是益加苦功逐日有進心氣稍稍和平雖時當逆境不免少動於中尋即排遣而終無大害也二十日又一逆事排遣不下心愈不悅蓋平日但制而不行未有拔去病根之意反復觀之而後知吾近日之病在於欲得心氣和平而惡

夫外物之遂以害吾中此非也心本太虛七情不可有所干物之相接甘辛鹹苦萬有不齊而吾惡其逆我者可乎但當於萬有不齊之中詳審其理以應之則善矣於是中心洒然此殆克己復禮之一端乎蓋制而不行者硬苦以理處之則順暢因思心氣和平非絕無於往日但未如此八九日之無間斷又往日家和平多無事之時今乃能於逆境擺脫懼學之不繼也故特書於冊冀日新又新讀書窮理從事於敬恕

之間漸進於克己復禮之地此吾志也效之遲速非所敢知洪熙元年乙巳七月二十一日與弼識於南軒

南軒柱帖云幽靜無非安分處清閒便是讀書時

知止自當除妄想安貧須是禁奢心

淡如秋水貧中味和似春風靜後功

壁間大書云力除閒氣固守清貧

病體衰憊家務相纏不得專心致志於聖經賢傳中心

並以鄙詐而無以致其知外貌並以暴慢而何以力
於行乎歲月如流豈勝痛悼如何如何七月二十六
日近暮書於南軒

數日家務相因憂親不置書程間斷胸次鄙吝甚可愧
恥竊思聖賢吉凶禍福一聽於天必不少動於中吾
之所以不能如聖賢而未免動搖於區區利害之間
者察理不精躬行不熟故也吾之所為者惠迪而已
吉凶禍福吾安得與於其間哉大凡處順不可喜喜

心之生驕侈之所由起也處逆不可厭厭心之生怨
尤之所由起也一喜一厭皆為動其中也其中不可
動也聖賢之心如止水或順或逆處以理耳豈以自
外至者為憂樂哉嗟乎吾安得而臻茲也勉旃勉旃
毋忽七月初二日書於南軒

處家少寬裕氣象

屢有逆境皆順而處

理家務後讀書南軒甚樂於此可識本心

枕上思在京時晝夜讀書不間而精神無恙後十餘年
疾病相因少能如昔精進不勝痛悼然無如之何兼
貧乏無藥調護只得放寬懷抱母使剛氣得撓愛養
精神以圖少長噫世之年壯氣盛者豈少不過悠悠
度日誠可惜哉

晝寢起四體甚暢中心洒然安貧樂道何所求哉

當念歲月晚而學無成可懼也然既往亦不得而追矣
繼今隨精力所到而進毋怠其志而已視古人自少

至老始終一致者不勝其慨愧矣

一事少含容蓋一事差則當痛加克己復禮之功務使此心湛然虛明則應事可以無失靜時涵養動時省察不可須臾忘也苟本心為事物所撓無澄清之功則心愈亂氣愈濁梏之反覆失愈遠矣

觀分門近思錄聞所未聞熟所未熟甚有益於身心性情足感朋友之有是書以相益也

觀近思錄覺得精神收斂身心檢束有歉然不敢少忘

之意有悚然奮拔向前之意

二月二十八日晴色甚佳寫詩外南軒嵐光日色矚映
花木而和禽上下情甚暢也值此暮春想昔舞雩千
載之樂此心同符

丙午

夜讀論語深感子思之說於目下用功最切亟當服膺
夜觀童子照魚靜聽流水自悟川上之歎及朱子安行
體用之旨

夜立庭間靜思踐履篤實純粹君子不可得也誠難能

也心所深慕而無由臻斯境可勝歎哉

觀農因瘡藉芳間卧膝間靜極如無人世今日雖未看
書然靜中思繹事理每有所得

峽口看水途中甚適人苟得本心隨處皆樂窮達一致
此心外馳則膠擾不暇何能樂也

晁公武謂康節先生隱居博學尤精於易世謂其能窮
作易之本原前知來物其始學之時睡不施枕者三
十年嗟乎先哲苦心如此吾輩將何如哉

觀花木與自家意思一般

看田至青石橋遊觀甚適歸焚香讀書外南軒風日和
煦攬景樂甚讀書理亦明著心神清爽

一日以事暴怒即止數日事不順未免胸次時生磊嵬
然此氣稟之偏學問之疵頓無亦難只得漸次消磨
之終日無疾言遽色豈朝夕之力耶勉之毋怠

枕上思近來心中閒思甚少此亦一進也

寢起讀書柳陰及東窓皆有妙趣晚二次事逆雖動於

中隨即消釋怒意未形逐漸如此揩磨則善矣

親農歸以眼痛廢書閒閱舊稿十六七年之間歲月如流而學行難進俯仰今昔為之悵然又感吾親日老益自悽愴不勝

大抵學者踐履工夫從至難至危處試驗過方始無往不利若舍至難至危其他踐履不足道也

時蔬園中雖暫廢書亦貧賤所當然往親農途中讀孟子與野花相值幽草自生而水聲琅然延佇久之意

思蕭洒

小童失鴨畧暴怒較之去年失鴨減多矣未能不動心者學未力耳

觀草廬文集序諸族多尚功名富貴恐吾晦庵先生不如是也惜未覩先生全集

外南軒讀孟子一卷容貌肅然午後眼痛四體俱倦就寢心無所用思歸鄉十五年歷艱實多不堪回首

坐外南軒滌硯書課綠陰清晝佳境可人心虛氣爽疑

此似躡賢境惜讀書不博耳

枕上默誦中庸至大德必受命惕然而思舜有大德既受命矣夫子之德雖未受命却為萬世帝王師是亦同矣嗟乎知有德者之應則宜知無德者之應矣何脩而可厚吾德哉

夜徐行田間默誦中庸字字句句從容詠歎體於心驗於事所得頗多

上不怨天下不尤人君子居易以俟命小人行險以僥

倖燈下讀中庸書此不肖恒服有效之藥也

與一鄰人談及不肖稍能負重私心稍悅

每日勞苦力農自是本分事何愠之有素貧賤行乎貧賤

小女瘡疾相纏不得專心讀書一時躁急不勝雖知素患難行乎患難然歲月不待人學問之功不進不得不憂也其實亦因早年蹉跎過了好時節以致今日理會不徹三十年前好用工何可得耶

緩步途間省察四端身心自然約束此又靜時敬也

知弗致已弗克何以學為

丁未

因暴怒徐思之以責人無怒故也欲責須思吾吾能此事否苟能之又思曰吾學聖賢方能此安可遽責彼未嘗用功與用功未深者乎況責人此理吾未必皆能乎此也以此度之平生責人謬妄多矣戒之戒之信哉躬自厚而薄責於人則遠怨以責人之心責己則盡道也

因事知貧難處思之不得付之無奈孔子曰志士不忘
在溝壑未易能也又曰貧而樂未易及也然古人恐
未必如吾輩之貧夜讀子思子素位不願乎外及游
呂之言微有得游氏居易未必不得窮通皆好行險
未必常得窮通皆醜非實經歷不知此味誠吾百世
之師也又曰要當篤信之而已從今安敢不篤信之
也

觀文章正宗感學德無進四十向逼終於小人之歸豈

勝悲痛

以事難處夜與九韶論到極處須是力消閒氣純乎道
德可也倘常情一動則去道遠矣

枕上熟思出處進退惟學聖賢為無弊若夫窮通得喪
付之天命可也然此心必半毫無愧自處必盡其分
方可歸之於天欲大書何者為聖賢何者為小人以
自警

自今須純然粹然卑以自牧和順道德方可庶幾嗟乎

人生苟得至此雖寒饑死刑戮死何害為大丈夫哉
苟不能然雖極富貴極壽考不免為小人可不思以
自處乎

與學者授論語讀至年四十而見惡焉其終也已不覺
惕然與弼年近四十矣見惡者何限安得不深自警
省少見惡焉斯可耳

燈下外南軒觀年二十時所作論三篇不勝悲歎何者
昔時志向的然以古聖賢為可學可至今逡巡苟且

二十年多病侵陵血氣漸衰非惟不能至聖賢欲求
一寡過人且不可得奈何奈何安得好學茂年痛傾
此意

學德無成而年光空老平生之志不得遂矣感恨何窮
無容此身傷哉

凡事誠有所不堪君子處之無所不可以此知君子之
難能也

胡生談及人生立世難作好人僕深味之嗟夫見人之

善惡無不反諸己可也

戊申

讀易倦觀晦菴先生年譜慨先哲之精勤愧騫輩之戚
裂惘然自失奈之何哉據今地位努力向前

途間與九韶談及立身處世向時自分不敢希及中庸
數日熟思須是以中庸自任方可無忝此生只是難
能然不可畏難而苟安直下承當可也

讀罷思債負難還生理蹇澁未免起計較之心徐覺計
較之心起則為學之志不能專一矣平生經營今日

不過如此況血氣日衰一日若再苟且因循則學何
可向上此生將何堪於是大書隨分讀書於壁以自
警窮通得喪生死憂樂一聽於天此心須澹然一毫
無動於中可也

倦寢夢寐中時時驚恐為過時不能學也

與九韶痛言為學不可不勇而此公自無奮發激昂拔
俗出羣之志予歸深為之太息徐思方自悼不暇安
有工夫於他人耶嗚呼日進無疆屬之已乎屬之人

乎勉之又勉勿為外物所困

近晚往鄰倉借穀因思舊債未還新債又重此生將何如也徐又思之須素位而行不必計較富貴不淫貧賤樂男兒到此是豪雄然此心極難不敢不勉貧賤能樂則富貴不淫矣貧賤富貴樂與不淫宜常加警策古今幾人臻斯境也

早枕思處世不活須以天地之量為量聖人之德為德方得恰好嗟乎安得同志共勉此事

處大事不能盡善意甚快快兼以寒疾時作風足攻人
讀書工夫間斷昏昏竟日痛感何由得入聖賢境界
也

早枕思當以天地聖人爲之準則因悟子思作中庸論
其極致亦舉天地之道以聖人配之蓋如此也嗟夫
未至於天道未至於聖人不可謂之成人此古昔英
豪所以孜孜翼翼以終身也

食後處事暴彼雖十分不是然我應之自當從容徐思

雖切責之彼固當得然不是相業

人生但能不負神明則窮通死生皆不足惜矣欲求如是其惟慎獨乎董子云人之所為其美惡之極乃與天地流通往來相應噫天人相與之際可畏哉

人須整理心下使教瑩淨常惺惺地方好此敬以直內工夫也嗟夫不敬則不直不直便昏昏倒了萬事從此墮可不懼哉

與友人夜別徐家山歸思一日數事頗當

凡事須斷以義計較利害便非

貧病相因讀書不前何以為力行之資

人須於貧賤患難上立得腳住克治粗暴使心性純然
上不怨天下不尤人物我兩忘惟知有理而已

觀晉史成帝見王導必拜及幸其宅拜其妻反覆詳其
始末為之掩卷太息丈夫際遇如此而功烈不過若
是其付託之重不減伊周而致主澤民視伊周何如
哉雖其志安於小成亦學力有所不逮耳信知人生

須自幼力學期於踐形必臻其極然後為無愧也孔子曰居則曰不吾知也如或知爾則何以哉又曰用之則行嗚呼安得反西飛之日而痛加學歟

今日覺得貧困上稍有益看來人不於貧困上着力終不濟事終是脆懦

教人須是循循善誘

玩中庸深悟心學之要而歎此心之不易存也克己遠巡無所成就四十而見惡焉其終也已

熟思平生歷試不堪回首間閱舊藁深恨學不向前身
心荒怠可憂可愧今日所當為者夙興盥櫛家廟禮
畢正襟端坐讀聖賢書收斂此心不為外物所汨夜
倦而寢此外非所當計窮通壽夭自有命焉宜篤信
之

數日守屯因工夫稍有次第須使此心泰然超乎貧富
之外方好

觀史時見古人卓卓之行不勝感激益思自奮

當學之難進乃見希賢之不易也

心是活物涵養不熟不免搖動只常常安頓在書上庶
不為外物所勝

看乙巳年日新簿惕然於心繼讀論語觀聖賢教人丁
寧之意益思自奮須用刻苦

以事暴怒即悔之須持其志毋暴其氣
應事後即須看書不使此心頃刻走作

數日養得精神差好須節節接續去莫令間斷

上無師下無友自己工夫又怠此生將何堪耶

細觀近思錄乃知聖賢教人之法備在方策而自己學力未至以致齷齪無量安得良朋共執此文細細講明以為持已處事之資也

斬截日新

精白一心對越神明

經旬學德廢怠夢寐中亦屢悵歎為小女授論語感聖人之微言悚然思奮安得良朋輔我此志

逴逴故人兩鬢已斑不覺愴然問其年方四十頃之此
公熟視予鬢亦已斑矣益為悽惻久之方別既而思
平生碌碌只此衰謝少壯不努力老大徒悲傷豈不
信哉夜歸書此於東窗噫書又終可得而讀耶君子
果不可得而成耶

新居栽竹夜歸吾妻語予曰昨夜夢一老人攜二從者
相過止於門令一從者入問與弼在家否答云不在
家從者曰孔夫子到此相訪教進學也與弼聞之為

金定四庫全書
卷十一
之惕然而懼躍然而喜感天地而起敬者再三脊背
為之寒慄自此以往敢不放平心氣專志於學德乎
敢各矯駘之力乎

往新居授書甚喜學有新益

聞友人所為顛倒益自警省實下工夫

看禮記倦寢思平生經歷之艱益歎古人之不易學

看語畧惕然憂念學德不進何以立世

己酉

苟一毫不盡其道即是自絕於天

坐門外圖書滿案子弟環侍乘綠陰納清風羣物生意
滿前而好山相賓主覽茲勝趣胸次悠然

早枕細思學德無進歲月忽晚回首平生恍然一夢可
勝悼哉繼今分陰須用痛惜毋蹈前非也

看近思錄甚有所得鄙吝之懷為之豁然

夜大雨屋漏無乾處吾意泰然

庚戌

夜默坐思學不能進朋友又無向前者此道日孤意思
忽忽無聊者久之

涵養本源工夫日用間大得力

青石橋刈稻往回村外與物皆春

晚穀不收夜枕思家用窘甚不得專意於書展轉反側
良父因念困窮拂鬱能堅人之志而熟人之仁敢不
自勉

夜觀晦庵文集累夜乏油貧婦燒薪為光誦讀甚好為
諸生授孟子卒章不勝感激臨寢猶諷詠明道先生
行狀久之頑鈍之資為之惕然

途中看言行錄歸及隔溪藉草臨流觀書甚樂杳然塵
外之趣

中堂讀倦遊後園歸絲桐三弄心地悠然日明風靜天
壤之間不知復有何樂

早枕痛悔剛惡偶得二句豈伊人之難化信吾德之不
競

所得為者不敢不盡分若夫利鈍成敗非我所計也此
心須常教洒然

時時痛加持志之功務消氣質之偏

游園萬物生意最好觀

安貧樂道斯為君子

遇逆境暴怒再三以理遣蓋平日自己無德難於專一
責人況化人亦當以漸又一時過差人所不免嗚呼
難矣哉中庸之道也

近來愈覺為人之難學不向前而歲月不待人奈何奈
何

枕上思晦庵文集及中庸皆反諸身心性情頗有意味
昨日欲書戒語云溫厚和平之氣有以勝夫暴戾逼
窄之心則吾學庶幾少有進耳今日續之云欲進乎
此舍持敬窮理之功則吾不知其方矣蓋日來甚覺
此二節工夫之切而於文集中玩此話頭益有意味
也

夜思承父師付託之重士友期望之深竦然增懼思有
以自拔於人欲而未知其方也

日來處困稍覺有力六月初一日早枕念歲月如流事
業不立豈勝慨歎

七月五日日臨鍾帖明窓淨几意思甚佳平生但親筆
硯及聖賢圖籍則不知貧賤患難之在身也

人之遇患難須平心易氣以處之厭心一生必至於怨
天尤人此乃見學力不可不勉

貧困中事事纏人雖則如此然不可不勉一邊處困一
邊進學

七月十二夜枕上思家計窘甚不堪其處反覆思之不得其方日晏未處久方得之蓋亦別無巧法只隨分節用安貧而已誓雖寒餓死不敢易初心也於是欣然而起又悟若要熟也須從這裏過

中夜思日月逝矣事業無進輾轉不寐以達於旦凡百皆當責己

夜誦明道先生行狀不勝感激會心處不知手之舞足之蹈也

日來正心工夫稍有意思

昨晚以貧病交攻不得專一於書未免心中不寧熟思之須於此處做工夫教心中泰然一味隨分進學方是不然則有打不過處矣君子無入而不自得然是難事於此可以見聖愚之分可不勉哉凡怨天尤人皆在此關不透耳

夜說朱子感興詩因告戒諸生語意抑揚彼此皆極感激

先哲云身心須有安頓處蓋身心無安頓處則日間擾
擾於利害之中而已此亦非言可盡默而識之可也
暮春遊園心廣體胖豈虛語哉 壬子

窮厄已極不可支撐兼病益困然亦安分不敢起怨尤
之念而所以益進吾之學益堅吾之志者不敢不勉
也

卧看康節詩遂熟睡方醒意思佳甚不啻封侯賜金也
雖極貧窶此命也不害其樂

於近思錄中所得比向日大有選庭中心洒然如沉疴
去體

觀百卉生意可愛

晴窓親筆硯心下清涼之甚忘却一身如是之窘也康
節云雖貧無害日高眠

窮通壽夭一聽於天行吾義而已

月下詠詩獨步綠陰時倚修竹好風徐來人境寂然心
甚平淡無康節所謂攻心之事

倦後暫寢起書先哲格言明窓淨几清風徐來不知天
壤之間復有何樂此身何幸至此也

昨日於文集中又得處困之方夜枕細思不從這裏過
真也做人不得增益其所不能豈虛語哉

日來甚悟中字之好只是工夫難也然不可不勉康節
詩云拔山蓋世稱才力到此分毫強得乎

正月初一日夜來心氣和平繼今學德宜加勉也

癸丑

有困極詩云困固平生甘不意如此極前程一聽天多

憂諒何益又云本心所主渾由已外物之來一聽天
早觀花草生意甚佳食後意思稍不快以窘極故也尋
開解之所得為者厚吾德耳窮通非我所能也

山中獨行甚樂萬物生意盎然時陟岡頂四望不勝之
喜欲賦山椒一覽詩

處困之時所得為者言忠信行篤敬而已

早觀生意可樂殘月尚在露華滿眼箇中妙趣非言語
所能形容東齋柱帖云窻前花草宜人意凡上詩書

悅道心

寄身於從容無競之境遊心於恬澹不撓之鄉日以聖賢嘉言善行沃潤之則廢幾其有進乎

不怨天不尤人下學而上達非聖人其孰知此味也哉人之病痛不知則已知而克治不勇使其勢日甚可乎哉志之不立古人之深戒也

勿忘勿助近日稍知此味天假以年尚宜少進窮通得喪可付度外也

患難中好做工夫所謂生於憂患死於安樂也然學力
淺者鮮不為所困耳嗟乎梁棟之具非禁風耐冰雪
安能勝其重哉

男兒須挺然生世間

三月二十日食後授書宿雨初霽生意充滿甚可樂也
看春秋近午霽景可人日甚舒長天地闊遠但病體
全乏精神不免寒饑亦隨分耳眼前隨分好光陰誰
道人生多不足

夜枕深念不得益精神以進乎學也

夜坐思一身一家苟得平安深以為幸雖貧窶太甚亦得隨分耳夫子曰不知命無以為君子也

東齋對月花竹參差清景可愛聽諸生誦聲甚樂時遊於外綠陰清夜真趣悠然

昨夜思舊時歲月事蹟為之慨然今日時復在懷嗟乎德業不立而時駸駸晚矣

先儒云道理平鋪在信乎斯言也急不得慢不得平鋪

之云豈不是如此近來時時見得如此是以此心較之往年亦稍稍向定但眼痛廢書一年餘為可歎耳

甲寅

處大事者須深沈詳審

早枕思平生踐履愧於聖賢者多矣至今不能自持欲大書不敢尤人四字以自勵也

眼痛不敢看書暫誦詩經甚覺意味深長但不敢久讀為之悵歎者久之

乙卯

暫閱舊藁二十八年
前事恍如一夢
豈勝感慨

讀韓子與李翱書
大有感於吾心

看韓文倦睡夢中
恍思少年日月
不勝感愴而醒
聰明不及於前時
道德日負於初心
信哉

五月初一日看韓文
晴色滿簾清風透戶
花草盈欄幽景可愛

時出門外卧綠陰
納涼甚樂

七月二十一日對野
講誦近晚曳杖逍遙
野外甚適

看晦庵文集大有感激

十二月二十九日祀先一日多憂學者既少而有志者尤少大為世道慮也

朱子云從容深宴養旨哉言也

丙辰

看言行錄龜山論東坡云君子之所養要令暴慢邪僻之氣不設於身體大有所省然志不能帥氣工夫間斷甚矣聖賢之難能也

累日看遺書甚好因思二程先生之言真得聖人之傳

也何也以其說道理不高不低不急不緩溫乎其夫子之言也讀之自然令人心平氣和萬慮俱消

倦睡覺來坐東齋看朱子文集天晴日永竹樹扶疎清景可人意思甚樂也

觀晦庵先生語錄慨然慮斯道不自知其年之邁氣之衰而病之多也

涵養此心不為事物所勝甚切日用工夫

中夜夢中痛恨平生不曾進學即今空老痛哭而寤

出遊陂畔遂於澗底坐久向日甚適省察身心幸有少
進

村外閒行遺書在手徐步自後坊坑過大同源觀山玩
水而歸於峽裏憩久枕石藉草而卧暖日烘衣鳴泉
清耳有浴沂佳致

夜枕省已稍有益欲大書多言害道吉人之辭寡躁人
之辭多思無邪康節四妄吟於東西齋

枕上思平生學德不進輾轉不安鷄鳴方寐

看朱子六十後長進不多之語恍然自失嗚呼日月逝矣不可得而追矣

觀伊洛關閩言行錄惕然大感于懷益思奮勵以往不知其氣之衰病之憊也

十一月單衾徹夜寒甚腹痛以夏布帳加覆畧無厭貧之意

閒遊門外而歸程子云和樂只是心中無事誠哉是言也

金少卿先生集 卷十一
近來身心稍靜又似進一步

暫閱舊藁偶得胡文定公蓋有名蓋天下致位廟堂得
行所學一段不勝感慨

枕上細思從今須進步不敢自絕于天窮通得喪聽乎
天命雖餓死溝壑不可喪此德矣

近日多四五更夢醒痛省身心精察物理

世間可喜可怒之事自家著一分陪奉他可謂勞矣誠
哉是言也

先哲云大輅與柴車較逐鸞鳳與鴟梟爭食連城與瓦礫相觸君子與小人鬪力不惟不能勝蕪亦不可勝也

正月十七夜夢玉生花如蘭滿地

己巳

所憑者天所信者命

辛未

八月初二夜夢日有食之既與弼從旁吹之火焰即熾
尋復其明

四日早寫藁紅日當窻秋花映日清風綠陰意豁如也

壬申

涵養吾一

癸酉

治上省自警編三二條甚好蓋知人當以聖賢自任也
學易稍有進但恨精力減而歲月無多矣只得隨分用
工以畢餘齡焉耳

山千形萬狀觀者自得之可也文千形萬狀作者自得
之可也

讀奏議一篇令人竦然噫清議不可犯也

甲戌

今日思得隨遇而安之理一息尚存此志不容少懈豈以老大之故而厭於事也

累日思平生架空過了時日

與學者話久大緊勉以栽培自己根本一毫利心不可萌也

晚知書史真有益却恨歲月來無多

乙亥

江西伍恒有書知程庸奉府主王侯命去大司成先生家借朱子語類抄對欲刊板以揚絕學惠後來喜不

自勝恨不即觀盛事之成也

東憲親筆硯好學至於不尤人學之至也

浴罷坐東憲親筆硯竹風拂几綠陰滿地

看彈章令人竦然付學者抄寫

午前治圃貧賤之理當然不敢辭勞

獨游隔溪數步而回無可與者

仁之至義之盡

見人之善惡無不反諸己

二月初一日云昨夜夢同三人觀漲擬同訪朱子不勝
悵歎而覺有詩云曠百千秋相感深依依不識是何
心金鷄忽報春窻曙惆悵殘魂帶病吟

丙子

吉人為善惟日不足凶人為不善亦惟日不足

得便宜是失便宜失便宜是得便宜

康節詩閒窻一覺從容睡願當封侯與賜金亦不必如
此說朱子從容深宴養好

傳羹送麵貧士克己為義者

萬事付之無心可也

三綱五常天下元氣家亦然一身亦然

丁丑

一日未死一日要是當

偶擷芳水尾悵然舊游得二句偶爾舊游行樂處擷芳

溪曲玩春流

動靜語默無非自己工夫

游隔溪擷芳暮春天氣一團清樂

看漚田晚歸大雨中途雨止月白衣服皆濕貧賤之分

當然也

靜坐獨處不難居廣居應天下為難

事往往急便壞了

不學則老而衰

五月二十五夜夢孔子孫相訪云承孔子命來兩相感
泣而覺至今猶記其形容

胡文定公云世事當如行雲流水隨所遇而安可也
卧看自警編惕然自省持已不可不嚴也

毋以妄想戕真心客氣傷元氣

夜坐門屋梧桐月照清風徐來

料得人生皆素定空多計較竟何如

天意順時為善計人情安處是良圖

請看風急天寒夜誰是當門定脚人

十二月初十夜夢云萬家喬木動清風

凡事不可用心太過人生自有定分行已則不可不慎

晉史數日愈覺收斂為至要

不失人亦不失言

打點平生日錄感慨係之矣

人生須自重

不怨天不尤人下學而上達當佩以終餘齒

夢云自畫者德不進又云自知不足者可大受而遠到
日行吾義吉凶榮辱非所計也聽天所命

食後高卧東窗義皇上人乎

夢誦詩云丁寧莫伐簷前樹聽我高堂紅杏歌

又夢云矯矯高樓卧白雲

食後倦寢夢朱子父子來枉顧

辛巳

趨炎者衆人所同尚德者君子所獨

夢云等閒識得東風意便是橋邊烏鵲春

高卧閒窻綠陰清晝天地何其闊遠也

游後坊登山椒坐磐石意甚適也欲構覽秀亭于此無

陟降之勞莫歸新月一鉤矣

閒卧新齋西日明
寬意思好道理平
鋪在著些意不得
彼以慳吝狡偽之心待我
吾以正大光明之體待之

看前去年日錄
倦寢細思平生學力止於此
精神日向衰憊
俯仰悵然空生世間也

壬午

詩云戰戰兢兢如臨深淵
如履薄冰七十二歲方知此
味信乎希賢之不易也

夜靜卧閣上
深悟靜虛動直之旨
但動時工夫尤不易
云

程子云五倫多少不盡分處至哉言也

學至于不尤人學之至也吾聞其語矣未見其人也

看儀禮圖閱舊日錄倦寢程子七十歲化犬馬之年七

十二矣何如何如

夜來枕上靜思一味聖學帖然終此餘喘已而

癸未

觀遺書數條西照明憲玩夫子之言如飲醇醪不覺心

醉也

徐步牆內看秧生塋靜中春意可樂也

甲申

靜中觀物理隨處有得

看乙巳丙午日錄感發多矣

乙酉

閱近數年日錄萬事不必計較徒勞心耳廓然而大公
物來而順應大公仁也順應義也

曉憲自誦云欲成美績須究良圖非夢也忽自然如此
耶誦豈鬼神有以警我耶當大書于壁日求少進

當事之危疑見人之措置卽子之教也

丙戌

遺書云人當審已如何不必恤浮議志在浮議則心不

在內不可應卒遽事

玩聖賢之言自然心醉不知手之舞足之蹈也

丁亥

曉枕誦易看去年日錄惕然興感不敢不以聖賢自任
日思奮勵庶不負友朋之誼也

夜看語類不忍釋卷但虛病不敢久也
德性學問不敢少怠但恨歲月來無多

學聖人無他法求諸己而已吉凶榮辱一聽於天
君子顧自處何如耳豈以自外至者為榮辱哉

天道福善禍淫君子但當謹守先聖賢名教居易以俟
命而已

昨夜夢誦云豈能存養此心之一豈鬼神教我哉

午後看陸宣公集及遺書易一親聖賢之言則心便一
但得此身粗安頃刻不可離也

倦寢得句云逐日從容深燕養憧憧慎勿役私心

閱舊跡偶見先友羅得昌先生手帖為不肖困於官糧
事嗚呼噫嘻若要熟也須從這裏過

聖賢氣象須臾不敢不勉

觀壁間帖故友孔諤繡衣巡按江西時與先子書有云
前與與弼契兄接談時頃探其中益有威武貧富之
所不能屈移者今雖蹇滯異日當為令罷不必慮也
惕然重書以警惰孔後任河南叅議戊寅歲僕在金
臺時聞久亡矣

戊子

隨處惟歎聖人難學

雨後生意可愛將這身來放在萬物中一例看大小大

快活

日夜惟知聖人好但庸資實難企也

憩亭子看收菜卧久見靜中意思此涵養工夫也

程子云天地間可謂孤立

憩亭玩語類三兩條不勝痛快

朱子云此道日孤

早夜思餘齡一味學聖人克其不似聖人者

夜卧閣思朱子云閒散不是真樂因悟程子云人於天

地間並無窒礙處大小大快活乃真樂也勉旃勉旃
張思叔詬罵僕夫程子曰何不動心忍性朱子云不哭
底孩兒誰不會抱又云處順不如常處逆動心忍性
始成功

午憩亭靜中胸次澹然

午後看日錄天晴仰思物理

今日觀書感慨多矣但精神短不敢久可惜少年日月
也

恰別處一近事薄哉風俗嗟乎自己德不可不厚也戒之戒之

看晦菴文集倦卧仰思至理有契不覺拊席

寫文集一紙曠百世而相感者抑不知何心也

觀晦菴文集親先生之教令人超然於世萬慮俱消竊思當時立於其門者宜何如哉

家事時嬰懷亦當順理而行情順萬物而無情可也

倦卧仰思古今國家治亂得失及人家盛衰得失為之

凜然

無時無處不是工夫

暫遊大門之外桃李爛然日麗風暄先王以茂對時育
萬物

日親聖賢嘉謨何幸如之但恨讀之晚矣

早憇自得亭親筆硯水氣連村游魚滿沼畦蔬生意皆
足樂也

施為欲似千鈞弩磨礪當如百鍊金

年老厭煩非理也

朱子云

一日未死一日要是當

歲月如流而學德有退無進有志之士其與感乎無感乎

玩遺書意不知所向安知斯人之為功聖人之責人也
常緩便見只欲事正無顯人過惡之意

觀五峯舊稿感慨係之矣

夜思平生經歷五更方寐聖人未嘗忘天下果哉未之
難矣

逐日親聖賢名教甚幸但漸期寡過而未能也

玩易默而繹之不勝痛快但恨歲月來無多

早盥櫛後東軒親簡編竹日明愜意初回鄉時石泉柱
帖云欲到大賢地須循下學功回首近六十年矣大
賢地何日到耶

於事厭倦皆是無誠

天下之至蹟而不可惡天下之至動而不可亂廓然而
大公物來而順應倦卧養病思已往踐履及聖賢名

教卧起天向暝矣

雖萬變之紛紜而應之各有定理

康齋集卷十一

欽定四庫全書

康齋集卷十二

明 吳與弼 撰

跋

跋伊洛淵源錄

永樂己丑冬姑蘇別駕李侯能白寄此集于先君與弼
燈下閱之伏覩道統一脈之傳不覺心醉而於明道先
生獵心之說尤為悚動蓋平昔謂聖賢任道之統者皆

天實篤生非人力可勉遂置聖賢於度外而甘於自棄
及覩此事乃知所謂程夫子者亦嘗有過亦資於學也
於是思自奮勵竊慕向焉既而盡焚舊時舉子文字誓
必至乎聖賢而後已辛卯冬與弼歸鄉里而京師官舍
被火意此書必煨燼矣居常思一再讀而不可得今年
春齋先君遺籍於蓮塘故址忽喜無恙遂奉至小陂茅
屋日敬玩味以酬素願嗚呼與弼迷途少改實始此文
於以見朱夫子纂集垂惠後學之功盛矣而李侯遠贈

之勤其敢忘哉

跋尚友二大字

舊友孫爾安寄以名筆佳墨其子納奉至小陂將有省
覲之行附此以答遠意云

跋忠國公石亨族譜

右忠國公石氏族譜一通命僕題焉夫公元勲盛德在
天下著太常而重彞鼎所以顯其親而光其族也至矣
雖能言之士無所容喙況在於僕敢贅乎哉天順戊寅

七月二十一日門下士崇仁吳與弼拜觀

跋秣陵陳氏家譜

都指揮陳君弘道枉顧寓館既而攜嗣子珣繼來且以家譜命題夫世間能事惟在讀書修身而已珣也崇乃志於詩禮之訓而益篤焉則所以濟其美者可量乎哉跋饒烈給假歸帖

此初入齋時帖也歲月不易得回首倏八載矣舍魚取熊掌在於所志何如耳

跋徐氏家譜

昔三衢徐君希仁教吾臨川也予寓五峯外氏因以得
陪餘論嘗辱其世譜之命而以不敏辭焉君既調官且
歸休林泉矣每欲一訪鄭公之鄉今乃始諧夙願而君
已老握手嗑唏語笑未洽而予以多病迫歸君猶以舊
命命我噫先德之美自足名家淺薄焉能為有無而知
我之過無以謝萬一益顏厚耳

跋四老西游圖

四老者進賢陳子憲吳志廣朱文貫陳子寧也西游者
索崇仁吳與弼歌其令君呂侯之賢以風厥鄉人也黃
眉皓髮年皆七八十跋涉凍途而甘心焉者秉彝好德
之誠也相行者邑生傅海也予既賦絕句詩以贈其歸
而好事者復圖以表焉

贊

黃在中遺像贊

縕昂霄之志負泛駕之材事業嗟其已矣山林邈自藏

輝朱顏皓齒鶴髮桃顙春風態度秋月襟懷昔予拜翁
于中壽雖病革而禮諧翁謝世之八年瞻圖像而肅齋
噫詩卷長留天地繼述乎後者宜愈遠而愈佳也

戴文振遺像贊

繫親仁於齒齡恒信宿於高門晚接隣於華里拜遺像
於諸孫

銘

硯銘

金匱要略卷十二
何產之異何保之良所諸涓滴所濟汪洋

啓

回饒氏議親啓

伏以人歆令聞金蘭契朱陸之高軒世篤嘉猷珠玉際
吳虞之逸駕未獲展門牆之敬忽枉飛姻好之牋伏承
某人第幾位令嗣房下第幾孫男某茂才資格英佳箕
裘間熟以某幾小女粗諳織紵未習德容特蒙畧齊鄭
之嫌而俾聯秦晉之匹猥承雅眷敢不恭依雖蕭嶺飛

覽之偉莫可攀緣而紫陽覆瓿之期實深屬望感茲榮
幸倍萬等夷謹奉狀謝伏惟照察謹狀

孫氏求婚啓

伏以仰止名宗久篤朱陳之好不量非偶復通秦晉之
歡以某男某器識凡庸才猷薄劣伏承令姪敏堂徵士
第一小娘子性質溫厚德容靜嘉妄意好逑之祈遽辱
于歸之諾戰越無地欣幸曷勝謹齋沐以諏辰敢肅恭
而告吉

回饒氏議親啓

翔翔槐市膠漆夙忝於椿庭問訊花封絲蘿新好於蘭
砌拜嘉良厚爲慰實多伏承令姪某進士第三令嗣茂
才梧竹高標豈輕匹配而某第二小女襁線庸品偶叶
蒼龜韓朱門墻數仞誠難於企及李黃步武異世固望
於同歸慶荷之私敷陳罔既

墓誌銘

孫君墓誌銘

君諱隆字仲迪姓孫氏世為豐城之數山人予距君居
限一嶺耳然未識也他日遇于劍水之濱容儀魁以樸
詞氣雅而溫予雖寡合而心竊竒焉已而賓予于其家
敦禮而尚德名宗故族之翹然者也正統丙辰正月丁
丑君以疾卒享年六十有七將以其年十一月庚申塋
于其鄉之某所其內外親戚賓友咸以君嘗辱予宜託
以銘季子勉將伯兄昂之命來請予適病勉意益虔不
易於是叙次其世而銘之曰唐處士諱瑫字伯玉者宣

宗時墓數山宋迪功卽監潭州南岳廟諱約之者於君
為八世祖始倣歐陽氏法為之譜伯玉而下系次有闕
譜自南唐倉監諱行琰始行琰生仁耶仁耶生敬忠敬
忠生餘慶餘慶四子景運景福景純景陽四景以來皆
日益庶力學為善代有令聞而景純者乃君之十二世
祖也曾祖諱惠字和仲祖諱暈字從達父諱某字友文
君少孤凡所以立其家啓其後者皆躬辛以致之而相
厥志者配徐氏也子四人昂勉操持女二人孫十人洪

浩澄淵淑治溫演溥濟乃銘曰孫居敷山遠自于唐德
門文苑族世厥芳爰暨君身適于中微惟君奮邁于祖
有輝既富而壽亦云福只慎終刻詞是謂有子

牛君墓誌銘

五峯主人牛君將塋仲子演致其臨終之命曰欲銘我
其吳先生乎嗚呼君知我者惡得不銘君諱琛其先由
河南官游于薊因家遵化縣之王家莊大父諱彥贈昭
信校尉撫州守禦千戶所百戶父諱均美撫州守禦千

戶所百戶致仕傳子忠尋陞副千戶封厥考武畧將軍
副千戶母田氏宜人既而調賴之會昌會昌君卒子選
嗣選未有後以卒夏官以次君當踐會昌君以微疾讓
弟斌斌卒君敦讓諸子夏官竟官君子澄君為人端毅
疎暢勤禮而泛愛尊賢若不及家庭之間肅然以和先
府君建博文堂集名縉紳次講授君與仲氏俱讀書通
大義卒克拔華夷為大家知我實由於仲氏而君固一
致焉托門墻僅四十載豈偶然而已哉君生洪武戊申

十二月十三日年八十三氣體倦勤內屬家事外與親
交訣遷正寢之二日而曰明當去矣翌日果然正統己
巳五月二十六日也君娶黃氏繼室周氏子四人長溫
學於予諸父甚愛重之蚤世矣澄會昌千戶演溥與吾
兒游女一人適撫州正千戶夏昶澄等以景泰冬十一
月己酉葬君臨川銀錠塘之先兆銘曰

於昭世德博文有堂克敬克紹雖鴈行先兆于歸銀
錠之臧

孺人黃氏墓誌銘

天順戊寅正月予以詔命將赴金臺鰲溪熊易二生道其所善寶塘謝愈盛上謁天使之館而通贄於予既而生屬子壻饒循謂昔日愈盛失所恃纔逾旬耳假拜使以登君子之庭為丐銘之地幸夫子矜憐之予固辭焉十月謝病歸田二生復以屬循且曰必欲得夫子銘然後愜於人子之心辭之數而請益勤焉嗚呼民之秉彝好是懿德誰無人子之心哉生之膝下喘息呼吸氣通

於親古今一耳然愛其親有篤不篤者存其天有多與寡也謝氏子於子道不其厚矣哉雖欲終辭詎可得邪竊嘗悲世人子有幸焉不幸焉有大幸焉大不幸焉幸不幸之中又萬不齊焉生而弗及見其親者矣夙喪親而弗克記憶者矣生弗克致其養死弗克致其葬者矣變故不一所不忍言而人子抱無涯之痛者多也謝氏子其於親也未嘗違旨甘家富而親壽考以終可謂幸矣又得吾銘以慰人子報親之忱予亦大為之慶焉於

是誌而銘之誌曰孺人生洪武乙卯正月十九日鰲溪
天授鄉麻溪黃叔獻女寶塘青雲鄉謝永昂婦歸弗迨
事其舅而奉姑甚孝為謝氏淑人天順戊寅正月甲子
年八十四以卒卒之日慟及臧獲可以考德矣十二月
癸酉祔葬本里周坊姑氏兆右永昂先二十年卒子二
人曰愈堅早世孺人撫其孤遺以教以婚曰愈盛孫四
人曾孫五人銘曰寬裕慈惠壽考是宜於昭令子千載
銘諸

邵楚材墓銘

醋兒其名楚材字派出河南邵其氏伊父見育鄭將軍
吾考實維鄭君壻而父沒時爾年稚吾家與居已經世
四十四壽女二人卒于正月歲丁巳墓爾臨汝石泉山
誌爾墓兮百千禩

易孺人墓銘

緊張有母慈且淑劍水淒涼久埋玉哀哀孤子遲我銘
圖報昊天難遂欲寒暑互往歲月遒出入起處常幽幽

安得特書不一書晶熒金石寬吾憂我聞中心怛以惻
紀德述行固其職母生癸酉卒丙寅葬惟丁卯湖名墨
妣系熊兮考南維祖克俊兮氏曰易十六歸作嘉謨配
代絕有道無亢悔薰蒸融液家以成年不足兮衆所矜
我歌不磨千載名恃此庶以慰冥冥孤子長跪淚盈盈
生死肉骨惟先生猗歟孤子其為誰曰循千載受子經
墓表

黃先生墓表

君諱寬字浩中幼孤弱冠始知學問中更苦節慕先正
草廬之為人號曰希吳與人談每樂道吳之學於書無
所不讀而易尤深恬默自守紛華不少介乎其意晚歲
德益茂平居恂恂鄉閭無少長翕然尊師之雖教授在
乎闈闈而未嘗一履公門世居縣北君贅橋東厭其喧
囂也從近郊之某處號曰草庵地既幽曠園池竹樹日
向清雅而諸子皆克世其業克乎有以遂其永矢之樂
焉嗚呼人咸多君之樂易近人而其中有介然不可移

者存則恐未盡識也於其冢嗣之請表其墓輒叙而為之詩曰溫乎其外兮衆所見也介乎其中兮吾所羨也

東臯居士墓表

居士姓吳氏字士奇號東臯代為東平名族與寒門通家累世予小子久獲親炙几杖故相知為周大父從道篤於教子遍禮名儒以為之師尊父某克承家法故居士於學甚早少長遭逢亂離艱險備歷故於才甚通為人豪邁間曠客至倒屣相迎款語詩書忘其朝夕酒半

輒高歌激烈有蕭洒出塵之想名居曰東臯舒嘯之軒
軒之大書曰左右圖書古今風月先子寄贈詩有東臯
先生英傑人又曰長日襟度溫如春誠哉是言也於永
樂某年某月某日卒葬近地之蜈蚣山某年文于其墓
曰

蜈蚣之脈宛蟠蚪白鷺之水靜相繆層巒疊嶂森連鉤
佳哉形勝雄斯丘有美一人儒者流於焉埋玉諧佳謀
高風欲考靡來由饒厥金石垂丕休

孺人羅氏墓表

孺人諱奴娘處士羅遜卿之女配胡君環卿胡氏世蹈
朴厚孺人以貞閒惠恭之質相其夫子雖處阨窮而宜
家之道靡渝胡君之禮孺人亦猶孺人之尊胡君也年
六十四永樂七年閏四月十七日以疾卒葬南坑塘北
又二十六年諸子立石表墓而徵文於予予幼承孺人
撫愛之慈且知德實深迺序而詩焉詞曰

德美以宜其配兮足承累世之淳龐雖嗇于其躬兮後

其昌

蔣節婦墓表

戴生享慶以祖妣墓未銘懼夫節義久將埋沒不傳也
恒戚于其心乃咨於其父請族祖子穎君讓其世與行
焉子文以表焉節婦諱滿奴姓蔣氏世為南昌豐城族
曾祖諱鈞字洪仲祖諱沐字叔新父諱椿字子莊母某
氏節婦年二十餘歸配唐山戴子鼎氏逾紀而子鼎遂
卒有子纔五歲戴故大家當是時孰不欲乘其危而利

其有節婦介持愈嚴以勤卒能完其家無毫髮喪教其子以及其孫不少替君子以為難嗚呼疾風知勁草不其然乎妣氏姑婦亦皆以節終時號一門三節冰霜互冽而金玉交輝盛矣哉銘曰

超逸駕兮往哲是程激薄俗兮壺彝惟馨立廬載銘兮永流厥聲

孺人汪氏墓表

三衢之常山邑庠生徐仕承尊公希仁命請其母孺人

墓石之文予與希仁知己仕舊生其何辭孺人姓汪氏
諱鳳娘世為常山士族高祖諱文璟登元進士第仕翰
林編修曾祖諱紹柳州教授孺人年二十七歸希仁游
邑庠得專經術為進士以孺人綜家也既而偕希仁官
臨川歸希仁調山東孺人以姑老弗往希仁厄於誣誤
久三子皆遠省時鄉里門戶甚迫孺人極力以應卒無
敗事希仁謝事自邑徙近地之新溪凡平生開創與結
架之勞多資賢助焉孺人生洪武丙辰二月初一日卒

景泰癸酉六月初十日八月壬申葬十八都蒙撐橋頭
先兆之側子三人畊學仕

祭文

祭外叔祖蘭雪先生

惟公簪纓茂裔詩禮名閥行端而固學富而精惟仁克
壽存順沒寧嗟予小子姻忝于甥贅未迨席哭不及庭
徘徊軫念禮負幽明拜瞻靈幔但以中情一觴敬酌神
其鑒誠

祭湖山黃先生


稟於天者秀拔學於己者清勤三振鐸於芹水兩考最
於成均屢攝司成之位譽益著于縉紳既致政而歸來
儀表重于鄉隣福已軼乎中壽佳子姓之振振忽微疾
而奄逝蓋天厚乎仁人嗟小子之孱薄早蒙開導之諄
諄思永酬於萬一宜承訃之悲辛淹疾阻于往哭何裒
曲之能伸顧頑兒以敬遣聊菲儀以是陳嗚呼哀哉尚
饗

祭外祖母伯氏夫人

嗚呼夫人育秀大家配美高門猗歟二氏克武克文惟
是夫人資懿德尊義義偉節壯氣凌雲天相眉壽福祉
孔繁夫人逝矣不亡者存嗟我小子幼沐深恩曰攜曰
抱曰涼曰溫于師于友于冠于婚以長以成難乎其論
厚德不報痛徹神魂幽明永隔日月其奔奄及歲除怛
焉如焚病莫驅走是遣諸孫往酹一觴腸裂聲吞嗚呼
哀哉尚饗

祭孫仲迪

嗚呼昔我與公邂逅于劍江之濱投分於片言之頃遂
承步暑同歸仁里信宿相留雖再覲止於二三而愛我
不啻平生方擬春和杖策攜琴重來謁公遍訪名山以
酬舊約而公棄我以逝矣嗚呼哀哉適此卧病不能往
哭祇遣一觴永訣終天尚饗



康齋集卷十二